

Part sinch – Òtica dij fass

An costa part i parloma dij fass ëd lus fàit da ragg parassiaj. I doma giusta quàich idèja che a vnirà a taj cand i parleroma 'd laser. Is limitoma a parlé dël fass gaussian, e sòn an nòstr but a basta.

TÀULA DLA PART SINCH

El fass gaussian.....	215
L'ampiëssa compléssa	215
Proprietà dël fass gaussian.....	216
Intensità	216
Potensa.....	217
Ragg dël fass	218
Divergensa dël ragg.....	218
Profondità 'd feu	219
Fase.....	219
Front d'onda	220
Paràmeter che a servo a caraterisé un fass gaussian.....	221
Trasmission d'un fass travers component òtich	221
Fass travers na lènte sutila	221
Arbatiment an 's në spécc sférich.....	222
Spécc pian	223
Spécc ant la strenziura	223
Spécc con l'istéssa curvadura dël front dl'onda.....	224
Trasmission travers un sistema òtich qualónque.....	224
Ij fass hermite-gaussian	225
Intensità dël fass.....	226

TAULA DLE FIGURE DLA PART SINCH

Figura 1 - Intensità dël fass an fonsion dla distansa radial pér tre distanse da l'orìgin.....	217
Figura 2 - Andura dl'intensità màssima an fonsion dla distansa z.....	217
Figura 3 - Ragg dël fass gaussian	218
Figura 4 - Ritard èd fase ant un fass gaussian, rispét a n'onda pian-a.....	219
Figura 5 - Ragg èd curvadura dij front d'onda.....	220
Figura 6 - Fass gaussian travers na lente.....	221
Figura 7 - Fass gaussian su në spécc pian	223
Figura 8 - Fass gaussian con në spécc ant la strenziura	223
Figura 9 - Front dl'onda coincident con la gombura dlë spécc	224
Figura 10 - Sistéma òtich traversà da un fass gaussian.....	224
Figura 11 - Fonsion G_1 d'órdin diferent	226
Figura 12 - Intensità dël fass su un pian trasversal, fonsion dl'órdin.....	227

EL FASS GAUSSIAN

Sto tipo 'd fass a lé col ch'a ven pì a taj. A l'é la descrission èd n'onda che a viagia ant un fass èd ragg para-assiaj, andova la potensa a resta concentrà antorna a l'ass èd propagassion. La distribussion dl'intensità dël fass a l'é na fonsion gaussian-a, e da sì a deriva 'l nòm dël fass midem. Sta descrission as adata bin a la lus prodòta, pr'esempi, da un laser.

L'ampiëssa compléssa

I l'oma vist, ant la part 4, che n'onda para-assial a l'é arpresentà da n'onda pian-a dël tipo e^{-jkz} , modulà da n'anvlup compléss $A(\mathbf{r})$, che a càmbia motobin adasi con la distansa z . I l'oma che l'ampiëssa compléssa a l'é:

$$U(\vec{r}) = A(\vec{r}) e^{-jkz}$$

Pér che st'ampiëssa compléssa $U(\mathbf{r})$ a sodisfa a l'equassion èd Helmholtz, $\nabla^2 U + k^2 U = 0$, a venta che l'anvlup $A(\mathbf{r})$ a sodisfa l'equassion parassial ed Helmholtz ch'i l'oma vist ant la part 4 :

$$\nabla_T^2 A - j2k \frac{\partial A}{\partial z} = 0.$$

andova $\nabla_T^2 = \frac{\partial^2}{\partial x^2} + \frac{\partial^2}{\partial y^2}$ a l'é l'operator èd Laplace trasversal, e as supon che l'anvlup a sia "*quasi*" costant, an manera che soe variassion su distanse dl'órdin dla longhessa d'onda λ a sio trascuràbij. An costa manera, da na mira local, j'onde as compòrtò coma ònde pian-e, e le normaj ai front d'ònida a son ragg para-assiaj.

Na solussion sempia èd costa equassion as oten con l'ipòtesi dj'onde ant l'aprossimassion paraboloidal, ch'i l'oma vist ant la part 4.

$$A(\vec{r}) = \frac{A_1}{z} e^{-jk\frac{\rho^2}{2z}} \quad \text{andova} \quad \rho^2 = x^2 + y^2 \quad \text{e} \quad A_1 \quad \text{a l'é na costant.}$$

Partend da costa solussion paraboloidal, e con na sempia trasformassion, as oten l'equassion dël fass gaussian. An efet l'aprossimassion paraboloidal a l'é solussion dl'equassion parassial èd Helmholtz, e se as fà na sostitussion èd variàbil butand $z - \xi$ al pòst èd z , as oten ancora n'espression pér $A(\mathbf{r})$ che a l'é solussion dl'equassion parassial èd Helmholtz:

$$A(\vec{r}) = \frac{A_1}{q(z)} e^{-jk\frac{\rho^2}{2q(z)}} \quad \text{andova} \quad q(z) = z - \xi$$

An costa equassion ξ a peul esse real, compléss ò imaginari pur, e l'equassion a continua a esse sodisfàita. Pròpi cand $\xi = -jz_0$, andova z_0 a l'é un nùmer real ciamà "**distansa 'd Rayleigh'**", l'espression sì dzora a dà l'anvlup compléss dël fass gaussian, vis-a-dì:

$$A(\vec{r}) = \frac{A_1}{q(z)} e^{-jk\frac{\rho^2}{2q(z)}} \quad \text{andova} \quad q(z) = z + jz_0$$

A conven separé l'ampiëssa e la fase 'd cost anvlup compléss, e pér sòn i scrivoma la fonsion compléssa $I/q(z)$ an termo èd doe fonsion reaj $R(z)$ e $W(z)$ tale ch'a sia:

$$\frac{1}{q(z)} = \frac{1}{R(z)} - j \frac{\lambda}{\pi W^2(z)}$$

Sostituend lòn ch'i l'oma trovà ant l'equassion dl'ampiëssa compléssa $U(\mathbf{r})$ i otnima

$$U(\vec{r}) = A_0 \frac{W_0}{W(z)} e^{-\frac{\rho^2}{W(z)}} e^{-jkz - jk\frac{\rho^2}{2R(z)} + j\zeta(z)}$$

andova ij vaire paràmeter dovrà a son dàit da:

$$W(z) = W_0 \sqrt{1 + \left(\frac{z}{z_0}\right)^2} \quad ; \quad R(z) = z \left(1 + \frac{z_0}{z}\right)^2 \quad ; \quad \zeta(z) = \arctan \frac{z}{z_0} \quad ; \quad W_0 = \sqrt{\frac{\lambda z_0}{\pi}}$$

i l'oma peui butà $A_0 = A_1 / jz_0$ pér comodità. A_0 e z_0 a son doi paràmeter che a dipendo da le condission inissiaj.

Proprietà dël fass gaussian

Ste proprietà a peulo esse derivà da j'equassion ch'i l'oma scrivù sì dzora.

Intensità

I l'oma vist che l'intensità òtica a l'é dàita da $I(\mathbf{r}) = |U(r)|^2$, e a l'é fonsion dla distansa assial z e dla distansa radial $\rho = \sqrt{x^2 + y^2}$. L'espression a dventa :

$$I(\rho, z) = I_0 \left(\frac{W_0}{W(z)} \right)^2 e^{-\frac{2\rho^2}{W^2(z)}} \quad \text{andova i l'oma butà} \quad I_0 = |A_0|^2$$

Pér ògni distansa z i l'oma che, an fonsion dla distansa radial ρ da l'ass z , l'intensità a l'é na fonsion a ciòca gaussian-a, e da sòn a deriva 'l nòm dël fass. An figura 1 i arportoma , a diferente distanse z , èl valor dl'intensità normalisà I/I_0 an fonsion dla distansa ρ da l'ass.

An sl'ass dël fass, vis-a-dì a $\rho = 0$, l'intensità a l'é màssima e a val

$$I(0, z) = I_0 \left[\frac{W_0}{W(z)} \right]^2 = \frac{I_0}{1 + \left(\frac{z}{z_0} \right)^2}$$

Se i vardoma com a varia l'intensità màssima normalisà $(I(0, z) / I_0)$ al varié dla distansa arlongh l'ass z i trovoma l'andura arpresentà an figura 2.




Figura 1 - Intensità d'el fass an fonsion dla distansa radial pér tre distanse da l'orìgin.




Figura 2 - Andura dl'intensità màssima an fonsion dla distansa z

I notoma che, cand $|z| \gg z_0$, l'espression èd costa intensità a dventa $I(0,z) = \frac{I_0 z_0^2}{z^2}$, e donca la diminussion dl'intensità a l'é coma cola dj'onde sfériche o paraboloidaj.

Potensa

La potensa luminosa P trasportà dal fass a l'é dàita soa intensità integrà su tutta la surfassa interessà. An pràtica as trata d'intégré l'intensità , a na distansa z qualonque, an sèl pian $z = costant$.

$$P = \int_0^\infty I(\rho, z) 2\pi \rho d\rho \quad \text{e da sì as arcava} \quad P = \frac{1}{2} I_0 (\pi W_0^2)$$

A l'é ciàir che l'arzultà a dipend nen da z , dal moment che la potensa dël fass as èspatara ma as perd nen.

As peul vardé cola ch'a lé la përsentual èd potensa trasportà dal fass ant na dàita surfassa antorna a l'ass, comprèisa ant un dàit ragg ρ_0 , con un pòch èd cont as treuva che:

$$\frac{1}{P} \int_0^{\rho_0} I(\rho, z) 2\pi \rho d\rho = 1 - e^{-\frac{2\rho_0^2}{W^2(z)}}$$

Se donca 'l ragg dla surfassa a val $\rho_0 = W(z)$, sta përsentual a l'é a-peu-pré ël 0,86, mentre ant na surfassa con ragg $\rho_0 = 1,5 W(z)$, sta përsentual a riva antorna al 0,99.

Ragg dël fass

Da lòn ch'i l'oma calcolà sì dzora i podoma vëdde che se 'l valor màssim dl'intensità as treuva an sl'ass, cost as arduv d'un fator $1/e^2$, che a val a-peu-pre 0,135, a la distansa $\rho = W(z)$. Dal moment che 86% dla potensa dël fass a l'é trasportà an costa surfassa, as dis che $W(z)$ a al'é 'l ragg del fass (ò 'dcò la "larghëssa dël fass").

I l'oma definì $W(z)$ coma $W(z) = W_0 \sqrt{1 + \left(\frac{z}{z_0}\right)^2}$, che a l'ha sò mìnem W_0 an sël pian $z = 0$. Ël

pont èd mìnem a l'é dit "strenziura dël fass" e, 'l diàmeter $2W_0$ a l'é dit "dimension dël pont luminos". Pér z che a val z_0 i l'oma che $W(z) = \sqrt{2}W_0$, e cand $z \gg z_0$, i l'avroma che $W(z) \approx \frac{W_0}{z_0} z = \theta_0 z$, andova $\theta_0 = \frac{W_0}{z_0}$. Costa espression as peul 'dcò scrive, second lòn ch'i l'oma butà : $\theta_0 = \frac{\lambda}{\pi W_0}$. An figura 3 i arportoma costi arzultà.




Figura 3 - Ragg dël fass gaussian

Divergensa dël ragg

L'àngol θ_0 che i l'oma indicà an figura a l'é la trassa d'un còno con ël cò ant l'origin, generà dal lat èd l'àngolche a vira antorna a l'ass z . A sto còno a tend la surfassa 'd q0rotassion generà da la curva $W(z)$ che a vira 'ntorna a l'ass z . Cand i soma ant la situassion $z \gg z_0$, i l'oma che 'l còno a conten l'86% dla potensa del fass.

L'àngol θ_0 a ven ciamà "divergensa angolar dël fass" e a peul esse scrivùa coma

$$\theta_0 = \frac{2}{\pi} \frac{\lambda}{2W_0}$$

Costa relassion a mostra che, ant un fass che a peussa esse considerà gaussian, se 'l diàmeter inissial a l'é cit èl fass a divergg èd pì, parèj coma se la longhëssa d'onda a l'é àuta. Pér oten-e un fass pòch divergent a venta pàrte da un diàmeter inissial pì gròss, e dovré na longhëssa d'onda curta.

Profondità 'd feu

Èl fass a l'ha sò pont pì consentrà a $z = 0$, e sì as peul disse che a l'é "a feu". Man man ch'as èslontan-a da sto pian a và sempe pì "fòra feu". As definiss, antlora, la distansa andova 'l ragg dël fass a stà andrinta al valor $W(z) = \sqrt{2} W_0$, distansa che, com i l'oma vist, a stà fra $-z_0$ e $+z_0$, coma "**profondità 'd feu**".

I l'oma donc che la profondità 'd feu a val $2z_0$, a val doi vire la distansa èd Rayleigh, e a peul esse scrivùa coma :

$$2z_0 = \frac{2\pi W_0^2}{\lambda}$$

Pér la profondità èd feu a val l'istéss discors fait pér la divergensa, giusta voltà al contrari. Pér avèj na longa profondità 'd feu a venta avèj un diàmeter ant l'orìgin pitòst gròss e na longhëssa d'onda curta.

Fase

I arcavoma la fase $\varphi(\rho, z)$ ant un fass gaussian da l'ampiëssa compléssa $U(\vec{r})$ ch'i l'oma scrivù prima coma $U(\vec{r}) = A_0 \frac{W_0}{W(z)} e^{-\frac{\rho^2}{W(z)}} e^{-jkz - jk \frac{\rho^2}{2R(z)} + j\zeta(z)}$. I l'oma che:

$$\varphi(\rho, z) = k z - \zeta(z) + \frac{k \rho^2}{2 R(z)}$$

che an sl'ass, andova $\rho = 0$, as arduv a:

$$\varphi(\rho, z) = k z - \zeta(z)$$




Figura 4 - Ritard èd fase ant un fass gaussian, rispét a n'onda pian-a

A-i son doe component èd costa fase, dont la prima, che a l'é $k z$, a l'é la fàse 'd n'onda pian-a. La sconda a l'é un ritard èd fase $\zeta(z)$ che a l'é dàit da $\zeta(z) = \arctan \frac{z}{z_0}$, com i l'oma vist, che a pòrta a na variassion total passand da $-\infty$ a $+\infty$. èd n'àngol π , second lòn ch'i l'oma disegnà an figura 4. St'efét a l'é ciamà "**efét Guoy**".

Front d'onda

Fòra da l'ass z èd propagassion, andova $\rho \neq 0$, a interven èl ters termo ch'i l'oma scrivù ant l'espression dla fase. A arpresenta la curvadura dël front rispét a un pian normal a l'ass z .

Se i scrivoma la condission pér che na surfassa a sia fase costanta i trovoma che a venta ch'a sia sodisfàita l'espression:

$$k \left[z + \frac{\rho^2}{2 R(z)} \right] - \zeta(z) = 2\pi q$$

Le fonsion $\zeta(z)$ e $R(z)$ a vario bin pòch, e donca as peulo consideré costant an sij front d'onda, pér ij pont che a stan andrinta al ragg dël fass. I podoma donca, dàita na distansa z an sl'ass, pensé che $\zeta(z)$ e $R(z)$ a sio costant an sël front d'onda che a ancontra l'ass z an col valor. I podoma donca scrive che:

$$z + \frac{\rho^2}{2 R} = q \lambda + \frac{\zeta \lambda}{2\pi}$$

andova $\zeta = \zeta(z)$ e $R = R(z)$. Costa a l'é l'equassion d'un parabolòid con ragg R . I notoma che i l'oma butà $R(z) = z \left(1 + \frac{z_0}{z} \right)^2$, e donca, an fonsion èd z , $R(z)$ a l'ha l'andura arpresentà an figura 5.




Figura 5 - Ragg èd curvadura dij front d'onda

As peul noté che ant l'origin èl front a l'é pian (con ragg che a tend a l'anfinì). Ant ij doi pont $\pm z_0$ a-i é un mìnìm èl valor $|R(z)|$, mentre cand z a dventa motobin gròss i l'oma che $R(z) \approx z$, e l'front a tira a dventé sférich.

Paràmeter che a servo a caraterisé un fass gaussian

Na vira che a l'é conossùa la longhëssa d'onda λ dël fass, mentre che pér n'onda pian-a a basta conosse l'ampiëssa e la diression èd propagassion, e per n'onda sférica a basta conòsse apliëssa e pont d'orìgin, pér un fass gaussian a venta conòsse él paràmeter A_0 (ampiëssa 'd pich), l'ass z ed propagassion, la posission èd soa strenziura e 'ncora un paràmeter che a peul esse, pr'esempi, él ragg dla strenziura W_0 , opura la distansa 'd Rayleigh z_0 . Parèj, se as conòssso ampiëssa e ass, a venta 'ncora conòsse doi dj'autri paràmeter.

Se a l'é conossù él nùmer compléss $q(z) = z + jz_0$, ant un pont qualonque 'd l'ass, antlora i conossooma la distansa z da col pont al pont dë strenziura (che a l'é pijà com orìgin) e la distansa 'd Rayleigh z_0 , giusta coma part real e part imaginaria èd q . Sto valor a l'é ciamà giusta **paràmeter q** .

Conossend él paràmeter q , as peul trové W_0 , con j'espression ch'i l'oma arcavà prima, e soa posission. Se peui q a l' conossù ant un pont, antlora a l'é bin fácil conòsslo an tuti ij pont, daita l'elementar dipendensa linear. Se ant él pont z_1 i l'oma un q_1 , ant él pont $z_2 = z_1 + l$ i l'avroma giusta $q_2 = q_1 + l$.

Se ant un dàit pont a son conossù ij valor èd $W(z)$ a èd $R(z)$, as peulo trové ij valor èd z , z_0 e W_0 con j'espression ch'i l'oma trovà, opura as peul trové 'l paràmeter q con l'espression:

$$\frac{1}{q(z)} = \frac{1}{R(z)} - \frac{j\lambda}{\pi W^2(z)}$$

Trasmission d'un fass travers component òtich

I suponoma 'd mantén-e le condission èd ragg parassiaj, e i vardoma còs a càpita cand un fass gaussian a ven mandà, an sl'ass òtich, a na lente ò an èspécc. Un fass gaussian a ven modificà (coma larghëssa e curvadura), ma a resta un fass gaussian.

Fass travers na lènte sutila

I l'oma vist ant la part 4 che la trasmëttensa dl'ampiëssa complessa èd na lent sutila che a l'abia na longhëssa focal f , a l'é proporsional a $e^{j\frac{k\rho^2}{2f}}$, andova $\rho^2 = x^2 + y^2$ (i mantnima j'istéssi arferiment). Se un fass gaussian a traversa la lent, soa ampiëssa compléssaa a ven moltiplicà pér sto fator èd fase.

I consideroma un fass gaussian definì coma sì dzora, sentrà an $z = 0$ e con na strenziuta W_0 , che a sia trasmëttù da na lent butà a na distansa z . Sòn a l'é arpresentà an figura 6.




Figura 6 - Fass gaussian travers na lente

La fase dël fass che a riva an sël pian dla lente val, a sta mira, $kz + \frac{k\rho^2}{2R(z)} - \zeta(z)$. I l'oma

vist prima cos a valo $R(z)$ e $\zeta(z)$. La fase dël fass dòp la lente a ven cambià e a dventa

$$kz + \frac{k\rho^2}{2R(z)} - \zeta(z) - k\frac{\rho^2}{2f} = kz + \frac{k\rho^2}{2R'(z)} - \zeta(z)$$

andova $\frac{1}{R'} = \frac{1}{R} - \frac{1}{f}$. I notoma che R a l'é positiv dal moment che 'l front d'onda dël fass incident a

l'é divergent, mentre R' a l'é negariv, dal moment che 'l front d'onda dël fass tramëttù a l'é convergent.

Sòn a dis che 'l fass trasmëttù a l'é 'ncora un fass gaussian, con larghëssa $W' = W$. As peul dimostré (cosa che sì i foma nen), che 'l ragg dla strenziura dël fass trasmëttù a val:

$$W'_0 = \frac{W}{\sqrt{1 + \left(\frac{\pi W^2}{\lambda R'}\right)^2}}$$

e che 'l senter a l'é a na distansa (negativa pérchè a stà a drita dla lente)

$$-z' = \frac{R'}{1 + \left(\frac{\lambda R'}{\pi W^2}\right)^2}$$

Da coste espression peui as treuvo le relassion fra ij paràmeter dij doi fass. Is arferima a lòn ch'a l'é indicà an figura 6. Prima però i definima un "**fator d'ingrandiment**" M coma

$$M = \frac{M_r}{\sqrt{1 + r^2}} \quad \text{andova} \quad M_r = \left| \frac{f}{z-f} \right| \quad \text{e} \quad r = \frac{z_0}{z-f}$$

Con coste posission as oten che:

$$\begin{aligned} W'_0 &= M W_0 \quad ; \quad z' - f = M^2 (z - f) \\ 2z'_0 &= M^2 (2z_0) \quad ; \quad 2\theta'_0 = \frac{2\theta'_0}{M} \end{aligned}$$

Na lente a peul donca cambié ij paràmeter d'un fass gaussian, sensa però cambié la natura gaussian-a dël fass.

Arbatiment an 's në spécc sférich

Se i definima n'arbatensa dl'ampiëssa compléssa com i l'oma fait pér la trasmëttensa, i trovoma che costa, pér në spécc sférich èd ragg R , a l'é proporsional a $e^{-j\frac{k\rho^2}{R}}$, andova pér convention $R > 0$ pér spécc bombà e $R < 0$ pér spécc angav.

L'assion èd nè spécc sférich èd ragg R un fass gaussian con ragg èd curvadura R_1 e larghëssa W_1 a l'é donca cola d'arbate 'l fass e modifiché la fâse d'un fator $-\frac{k \rho^2}{R}$. Èl fass arbatù a resta gaussian e sò paràmeter a son :

$$W_2 = W_1 \quad ; \quad \frac{1}{R_2} = \frac{1}{R_1} + \frac{2}{R}$$

La relassion d'ij ragg a l'é l'istéssa 'd cola per la trasmission dla lente sutila, se as considera l'echivalensa $f = -\frac{R}{2}$. Sòn a dis che 'l fass gaussian a ven modificà pròpi coma da na lente sutila, gavà pér la diression èd propagassion, e a resta un fass gaussian (a l'é ciâir che i consideroma nè "spécc sutil" ant l'istéssa manera dla "lente sutil", e sempe l'aprossimassion parassial).

I consideroma sì sota tre cas d'anterésse:

Spécc pian

A veul dì che i consideroma che $R = \infty$. Se i sostituìma ant j'espression trovà a arzulta che $\frac{1}{R_2} = \frac{1}{R_1}$ e donca che $R_1 = R_2$. Lë spécc a càmbia mach diression al ragg, sensa cambié la curvadura dle surfassa d'onda, com as peul vèdde an figura 7.




Figura 7 - Fass gaussian su nè spécc pian

Spécc ant la strenziura

An sto cas èl ragg èd curvadura dël front èd l'onda a l'é $R_1 = \infty$, dal moment che ambele l'onda a l'é pian-a. I l'oma che $R_2 = \frac{R}{2}$. Se lë spécc a l'é angav (vis-a-dì con $R < 0$), antlora 'dcò R_2 a l'é $R_2 < 0$ e 'l fass a convergg vers na strenziura pì cita. Sòn a l'é arportà an figura 8.




Figura 8 - Fass gaussian con nè spécc ant la strenziura

Spécc con l'istéssa curvadura dël front dl'onda

An sto cas i l'oma che $R_1 = -R$. Antlora a arzulta da nòstra relassion che $R_2 = R$, e sòn a veul dì che 'l fass arbatù a cobia precis con él fass incident. D'àutra part, an sto cas, le normaj al front a son èdcò normaj a lë spécc, e se i consideroma coste normaj coma ragg, costi a torno andarera copiand él ragg d'ariv. Sòn a l'é arpresentà an figura 9.




Figura 9 - Front dl'onda coincident con la gombura dlë spécc

Trasmission travers un sistema òtich qualónque

Sensa andé trop ant l'ancreus, e sempe considerand situassion parassiaj, i disoma giusta doe cose an 's la trasmission d'un fass gaussian travers un sistema òtich che a sia arpresentà da na matris èd cole viste ant la prima part.

I consideroma donca un sistema arbitrari coma col arpresentà an figura 10, andova i l'oma un fass gaussian an intrada caraterisà da un ragg èd curvadura R_1 e na larghëssa W_1 . Èl fass, pér efét dël sistema con matris $M = \begin{bmatrix} A & B \\ C & D \end{bmatrix}$, a seurt caraterisà da un ragg R_2 e na larghëssa W_2 .




Figura 10 - Sistéma òtich traversà da un fass gaussian

Ij paràmeter q_1 a l'intrada dël sistema e q_2 a la seurtia a përmëtto d'arcavé ij ragg R e le larghësse W , e fra intrada e seurtia a val sempe la relassion:

$$q_2 = \frac{A q_1 + B}{C q_1 + D}$$

J'element A, B, C, D a son determinà, an fonsion él component, òtich com a son stàit determinà ant le patriss pér l'òtica dij ragg. Èdcò ambelessì a valo tute le considerassion ch'i l'oma fait a propòsit dl'òtica dij ragg e, an particolar la composission èd different component an cascà. Macassìa i andoma nen pì ant 'ancreus su sto sogét.

IJ FASS HERMITE-GAUSSIAN

A-i son nen mach ij fass gaussian che a sodisfo a l'equassion parassial èd Helmholtz, ma a-i son vàire diferente solussion. A son macassia èd gròss interésse cole solussion che a supon-o front d'onda paraboloidaj, coma la solussion gaussian-a, contut che a l'abio na diferenca distribussion d'intensità. Èl vantagi èd coste solussion a l'é che a son compatibij con ònde arbatùe da spécc sférich èd gròss ragg, coma coi dovrà pér j'angav arsonant dij laser. I consideroma un fass gaussian con d'anvlup compléss dàit da:

$$A_G(x, y, z) = \frac{A_1}{q(z)} e^{-jk\frac{x^2 + y^2}{2q(z)}}$$

andova $q(z) = z + jz_0$. I l'oma vist che 'l ragg dèl fass $W(z)$ e 'l ragg èd curvadura dèl front d'onda

$$R(z) \text{ a son dait da } W(z) = W_0 \sqrt{1 + \left(\frac{z}{z_0}\right)^2} \text{ andova } W_0 = \sqrt{\frac{\lambda z_0}{\pi}}, \text{ e da } R(z) = z \left[1 + \left(\frac{z_0}{z}\right)^2\right].$$

I consideroma adéss na sonda onda, dont l'anvlup compléss a l'é na version modulà dèl fass gaussian:

$$A(x, y, z) = X\left(\sqrt{2} \frac{x}{W(z)}\right) Y\left(\sqrt{2} \frac{y}{W(z)}\right) e^{jZ(z)} A_G(x, y, z)$$

andova le fonsion $X(-), Y(-), Z(-)$, a son fonsion reaj.

Se sta fonsion a esist, antlora a venta ch'a l'abia l'istéssa fase dl'onda gaussian-a, a meno èd na fase $Z(z)$ che a dipend nen da x e y . Se $Z(z)$ a l'é na fonsion che a vària pian con z , antlora le doe onde a l'han j'istéss front d'onda paraboloidaj, con l'istéss ragg èd curvadura $R(z)$, e donca a son tratà a l'istéssa manera da le lente sutile e jé spécc.

Sempe se sta fonsion a esist, antlora a venta che l'ampiëssa:

$$A_0 X\left[\sqrt{2} \frac{x}{W(z)}\right] Y\left[\sqrt{2} \frac{y}{W(z)}\right] \left[\frac{W_0}{W(z)}\right] e^{\frac{x^2 + y^2}{W^2(z)}}$$

andova $A_0 = \frac{A_1}{jz_0}$, a sia na fonsion èd $x/W(z)$ e èd $y/W(z)$ andova le larghësse an diression x e y

a cambio con z second l'istéss fator dë scala $W(z)$. La distribussion dle intensità an sël pian trasversal an diression x e y a son fonsion gaussian-e modulà da le fonsion $X(-)$ e $Y(-)$.

St'onda modulà a arpresents n'onda che a l'é nen gaussian-a, ma che a l'ha j'istéssi front d'onda e l'istéssa divergensa angolar dla fonsion gaussian-a.

Sta fonsion d'onda a esist se a-i son tre fonsion $X(x)$, $Y(y)$, $Z(z)$ taj che la fonsion $A(x, y, z)$ ch'i l'oma scrivù a sodisfa a l'equassion èd Helmholtz.

Se i sostituima $A(x, y, z)$ ant l'equassion èd Helmholtz e i consideroma che l'equassion èd partensa $A_G(x, y, z)$ a sodisfa chila midema a l'equassion èd Helmholtz, e definend ancora doe variàbij

$$u = \sqrt{2} \frac{x}{W(z)} \text{ e } v = \sqrt{2} \frac{y}{W(z)} \text{ dòp sta sostitussion i trovoma:}$$

$$\frac{1}{X} \left(\frac{\partial^2 X}{\partial u^2} - 2u \frac{\partial X}{\partial u} \right) + \frac{1}{Y} \left(\frac{\partial^2 Y}{\partial v^2} - 2v \frac{\partial Y}{\partial v} \right) + k W^2(z) \frac{\partial Z}{\partial z} = 0$$

An costa equassion ij tre termo dël prim mèmber a son ognidun fonsion èd n'ùnica variàbil e a son donca indipendent l'un da l'autr, donca a venta che a sio costant. Se i ciamoma $-2\mu_1$ la costant dël prim termo e $-2\mu_2$ la costant dlë scond termo, èl ters termo a venta ch'a vala $2(\mu_1 + \mu_2)$, i podoma scrive tre equassion diferensiaj ordinàrie, ognidun-a pér na variàbil. I otmoma:

$$-\frac{1}{2} \frac{d^2 X}{du^2} + u \frac{dX}{du} = \mu_1 X \quad ; \quad -\frac{1}{2} \frac{d^2 Y}{dv^2} + v \frac{dY}{dv} = \mu_2 Y \quad ; \quad z_0 \left[1 + \left(\frac{z}{z_0} \right)^2 \right] \frac{dZ}{dz} = \mu_1 + \mu_2$$

I stoma nen a intré ant ij particolar dle solussion èd coste equassion, ma i disoma che a-i é tuta na famìja 'd solussion, caraterisà da nùmer antrégh pér $\mu_1 = l$ e $\mu_2 = m$.

L'espression dl'ampiessa compléssa che as oten a l'é donca caraterisà da doi ìndes che a andividùo un-a dle solussion dla famija:

$$U_{l,m}(x, y, z) = A_{l,m} \left[\frac{W_0}{W(z)} \right] G_l \left[\frac{\sqrt{2}x}{W(z)} \right] G_m \left[\frac{\sqrt{2}y}{W(z)} \right] e^{-jkz - jk \frac{x^2 + y^2}{2R(z)} + j(l+m+1)\zeta(z)}$$

Le fonsion G_l e G_m a dipendo da le variàbij ch'i l'oma definì coma u e v , e l'ìndes a ìndica l'òrdin dla solussion. Sì i arportoma l'andura indicativa dj'òrdin bass èd G_l , an figura 11.




Figura 11 - Fonsion G_l d'òrdin diferent

Un fass che a corrisponda a la solussion d'òrdin (l, m) a l'é dit "**fass hermite-gaussian d'òrdin l, m** ". A l'é facile da dimostré che 'l fass d'òrdin $(0, 0)$ a corrispond al fass gaussian ch'i l'oma vist prima.

Intensità dël fass

L'intensità d'un fass dë sto tipo, che a sia d'òrdin (l, m) a l'é dàita da l'espression;

$$I_{l,m}(x, y, z) = |A_{l,m}|^2 \left[\frac{W_0}{W(z)} \right]^2 G_l^2 \left[\frac{\sqrt{2}x}{W(z)} \right]^2 G_m^2 \left[\frac{\sqrt{2}y}{W(z)} \right]^2$$

e a peul esse arpresentà an fonsion dle distançà normalisà u e v , com a l'é apertò an figuira 12. As peul vèdde che pì l'ordin a l'é àut e pì 'l fass a l'é largh.




Figura 12 - Intensità d'el fass su un pian trasversal, fonsion dl'ordin

L'arpresentassion an figura a arsent dij lìmit gràfich dëlsistema dovrà, ma a l'é bastansa ciàira.

A-i son ancora d'àutri tipo 'd fass, che però sì i stoma nen a vardé. Parland èd laser, ant la session dedicà a l'eletrònica, i arpijroma sto sogét.

pàgina lassa veuida apòsta